



Sermip ergullu niuernikkut iluaqutigineqarnissaat pillugu inatsimmi § 8 malillugu sermimik aamma/imaluunniit imermik iluaquteqarnissamut pisinnaatitsissummut piunasaqaatit nalinginnaasut

08-03-2019

Postboks 930
3900 Nuuk
Tel. (+299) 34 68 00
Fax (+299) 32 43 02
E-mail: isiin@nanoq.gl
www.nanoq.gl

Kalaallit Nunaanni sermimik aamma imermik iluaquteqarniarluni ingerlatat, tassunga ilaalluni imermik sinneruttumik, Sermip ergullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi malittarisassaqaarpoq ("sermimut imermullu inatsit").

Sermimut imermullu inatsit aaqjissuussamik iluaquteqartarnermik tungaveqarpoq. Sermimik imermillu iluaquteqarneq, tassunga ilaalluni imermik sinneruttumik iluaquteqartarneq, taamaallaat pisinnaavoq Naalakkersuisunit tamatumunnga pisinnaatitsisumik nalunaarfigineqarnikkut. Atuinissamut pisinnaatitsissut taamaallaat ingerlatseqatigiiffinnut aalajangersimasunut nalunaarutigineqarsinnaavoq. Ingerlatseqatigiiffimmut taamaattumut pisinnaatitsisumik nalunaaruteqarnikkut ingerlatseqatigiiffik taanna pisinnaatitsissut naapertorlugu iluaquteqarnissamut akuersissummik pigisaqalertarpoq. Pisinnaatitsissutinik taama ittunik nalunaaruteqarnermut atatillugu Naalakkersuisut piunasaqaatinik aalajangersimasunik aalajangersaasinnaapput, pisinnaatitsissummik pigisaqartumut aamma ingerlatanut sermimik imermillu atuinissamut pisinnaatitsisumut aalajangersimasumut ("atuinissamut pisinnaatitsissut") atuuttumik.

Immikkoortuni tulliuttuni sermimut imermullu inatsimmi § 8 naapertorlugu imermik sinneruttumik iluaquteqarnissamut pisinnaatitsissummi nalunaarutigineqartumut piunasaqaatit nalinginnaasut Naalakkersuisunit aalajangersarneqartut eqqartorneqassapput.

1. Pisinnaatitsissummut piunasaqaatit nalinginnaasut aamma akiliuteqartarneq

Sermimut imermullu inatsit malillugu sermimik aamma/imaluunniit imermik iluaquteqarnissamut akuersissut malillugu pisinnaatitsissutinik piginnittunut

tamatigoortutut piunasaqaatinik atuuttoqarpoq. Piunasaqaatit tamakku sermimut imermullu inatsit malillugu atuinissamut akuersissutip nalunaarutigineqarnissaa pillugu qinnuteqarnermi, aammalu sermimut imermullu inatsit malillugu atuinissamut akuersissummut nalunaarutaasumut akuersissuteqarfiup nalaani tamarmi naapertuutsinneqassapput.

Immikkoortuni tulliuuttuni atuinissamut pisinnaatitsissummut piunasaqaatit ilai aamma akuersissut eqqartorneqassapput.

1.1 Pisinnaatitsissut naapertorlugu piffissaq pisinnaatitsissuteqarfiusoq

Sermimik imermillu inatsimmi § 8 naapertorlugu imermik sinneruttumik iluaquteqarnissamut pisinnaatitsissut piffissamut aalajangersimasumut ukiut 20 angullugit nalunaarutigineqarsinnaavoq (piffissaq pisinnaatitsissuteqarfiusoq).

Piffissaq pisinnaatitsiffiusoq ilaatigut ingerlatat aningaasatigut iluanaarfiusinnaaneritut periarfissaq eqqarsaatigalugu aalajangersarneqassaaq.

Naalackersuisut piffissaq pisinnaatitsiffiusup piffissamik aalajangersimasumik sivitsorneqarnissaa nalunaarutigisinnaavaat. Sivitsuineq piunasaqaatit allaanerusut najoqqutaralugit nalunaarutigineqarsinnaavoq. Taamaattorli piffissaq pisinnaatitsissuteqarfiusoq tamarmiusoq ukiunit 30-nit sivisunerusinnaangilaq.

1.2 Imermik sinneruttumik atuineq

Akuersissummik nalunaarfigineqarsinnaanermut akuersissutillu atortuutiinnarnissaanut piunasaqaataavoq akuersissut imermik sinneruttumik iluaquteqarnissamut akuersissummik pigisaqartussap akuersissummik allaganngorlugu tunineqannginnerani pituttuisuusumik atortuusussamillu ingerlatseqatigiiffimmut pilersuisuusumut pisisarnermut isumaqatigiissuteqarsimanissaa, tamatumani assersuutigalugu Nukissiorfinnut, akuersissummik pigisaqartup pisisarnissaanik iluaquteqarnissaanillu, imermik sinneruttumik ingerlatseqatigiiffimmit pilersuisuusumiit, najukkami sumiiffimmi pineqartumi (imermik pisisarnermut isumaqatigiissut), imermillu pisisarnermut isumaqatigiissutip piffissami akuersissuteqarfiusumi tamarmiusumi atuuttuunissaa.

Aamma pisinnaatitsissutip pigiinnarnissaanut piunasaqaataavoq imermik sinneruttumik atuineq, ingerlatsinerlu tassunga attuumassuteqartoq, imermik pisinissamik isumaqatigiissut tunngavigalugu aamma naapertorlugu ingerlanneqassasut.

Pilersuisutut ingerlatseqatigiiffiup, tamatumunnga ilaalluni assersuutigalugu Nukissiorfiit, pilersuisussaannermik pisussaaffimminik eqqortitsinissaa tamatigut salliutinneqassaaq, pisinnaatitsissummik pigisaqartup sermimut imermullu inatsit naapertorlugu imermik sinneruttumik atuinissaanut, aamma tamanna pillugu pilersuisutut ingerlatseqatigiiffimmik isumaqatigiissuteqarneranut naleqqiullugu.

1.3 Atuinissamut pilersaarut aamma uninnissamut pilersaarut

Akuersissummi ilaassaaq sumiiffik akuersissuteqarfiusoq, imermik pilersuisutut ingerlatseqatigiiffiup pilersuinermini tigooraavigisaa.

Pilersuisutut ingerlatseqatigiiffiup sumiiffik tamanna aamma sumiiffimmi tassani atuinarluni ingerlatsineq akisussaaffigai. Sumiiffiup pisinnaatitsiffiusup taassuma saniatigut pisuni immikkut ittuni sumiiffik pisinnaatitsiffiusoq sulii alla pisinnaatitsissummut aamma ilaasinnaavoq, tassani erngup sinneruttup atornissaa pillugu pisinnaatitsissummik pigisaqartoq nammineq imermik sinneruttumik ingerlatsinerminik ingerlataqassalluni. Assersuutigalugu tassaasinnaavoq toqqortaqroneq (uninngatitsineq), suliarinninneq imaluunnit imermik sinneruttumik atorneqartumik puiaasaanut maqitsineq. Taama ittuni pisinnaatitsissummik pigisaqartoq nammineq sumiiffimmut tassunga tassanilu ingerlataminut akisussaassaaq, tassunga ilaallutik sumiiffik pillugu aamma ingerlatsinerit pillugit atuinissamut pilersaarusiamik uninnissamillu pilersaarusiamik suliaqarnissat.

Pisinnaatitsissummik pigisaqartoq akuersissut aallaavigalugu atuinissamut suliniutissanut tamanut tunngasunik atuinissamut pilersaarusiussaaq kiisalu qanoq salinissamut tunisassiornissamut uninnissamut pisinnaatitsissummik pigisaqartoq pilersaarusiussaaq (uninnissamut pilersaarut). Atuinissamut pilersaarut tassunga tunngassuteqartut ilanngussat Inuussutissarsionermut Nukissiuuteqarnermullu Naalakkersuisoqarfimmut nassiunneqassapput.

Pilersaarutit taakku tamarmik Naalakkersuisunit akuerineqaqqaassapput.

Pisinnaatitsissut naapertorlugu ingerlatat aallartinneqassanngillat pilersaarutit taakku tamarmik Naalakkersuisunit akuerineqareertinnagit.

Pilersaarutini akuersinerminni Naalakkersuisut piumasaqaatinik annertunerusunik erseqqinnerusunillu aalajangersaasinnaapput, pissutsit attuumassuteqartut suulluunniit pillugit. Ilaatigut tassaasinnaapput teknikkimut tunngasunut piumasaqaatit, isumannaa-llisaanermut, avatangiisinut, nunaminertanut, pisuussutinut aamma pitsaassutsinut piumasaqaatit il.il. ,

Pilersaarutit aamma akuersissutit pilersuisutut ingerlatseqatigiiffiup atuiniarluni ingerlataanut pilersissimasaanullu allanut nalinginnaasumik attuumassuteqarneq ajorput, tassani ilaallutik pilersitsinerit, atuneq, pilersitat taamaattut il. il. matunerat peernerallu.

Pisinnaatitsissummik pigisaqartup ataavartumik pilersaarutit nutarsartassavai allangortittarlugillu, assersuutigalugu atuinermi ingerlatat annertuumik allangortinneqarpata.

1.4 Atorneqartup annertussusia annerpaaq aamma minnerpaaq

Naalakkersuisut erngup sinneruttup atorneqartussap annertussusissaa annerpaaq pisinnaatitsissummik pigisaqartup pisinnaatitsissut naapertorlugu ukiut tamaasa atorsinnaasa pillugu pisinnaatitsissummi aalajangersaasinnaapput. Naalakkersuisut taama ittunik piumasaqaateqarlutik pisinnaatitsisumik nalunaaruteqassallutik aalajangiisinnaapput, naak pisinnaatitsissummik pigisaqartoq pisinnaatitsissummik tamakkuninnga piumasaqaatitaqanngitsumik qinnuteqarsimagaluartoq.

Naalakkersuisut aamma pisinnaatitsissummi piumasaqaatinik erngup sinneruttup atorneqartussap annertussusissaa minnerpaaq pisinnaatitsissummik pigisaqartup pisinnaatitsissut naapertorlugu ukiut tamaasa atorsinnaasa pillugu aalajangersaasinnaapput. Naalakkersuisut taama ittunik piumasaqaateqarlutik pisinnaatitsisumik nalunaaruteqassallutik aalajangiisinnaapput, naak pisinnaatitsissummik pigisaqartoq pisinnaatitsissummik tamakkuninnga piumasaqaatitaqanngitsumik qinnuteqarsimagaluartoq.

1.5 Naalakkersuisunut akiliummik (royalty) akiliuteqartarneq

Pisinnaatitsissummik pigisaqartoq Naalakkersuisunut akiliummik (royalty) akiliuteqartassaaq. Royalty imermut liiterimut atorneqartumut DKK 0,04-mut aalajangersarneqarpoq.

Akiliut qaammatit pingasukkaartumik - kvartalikkaartumik akilerneqartassaaq.

Pisinnaatitsissummik pigisaqartup akuersissutip tunniunneqarnera aallarnerfigalugu piffissami aalajangersimasumi akiliummik (royalty'mik) akiliisussaatinneqannginnissani qinnutigisinnaavaa. Takuuk sermimut imermullu inatsimmi § 25, imm. 2.

1.6 Naalackersuisunut akitsuutinik akiliutinillu akiliisarneq

Pisinnaatitsissummik pigisaqartoq ingerlatat pisinnaatitsissummut ilaasut pillugit tamakku pillugit inatsit naapertorlugu akitsuutinik akiliutinillu akiliisassaaq.

Pisinnaatitsissummik pigisaqartup akuersissutip tunniunneqarnera aallarnerfigalugu piffissami aalajangersimasumi ingerlatat pisinnaatitsissummut ilaasut pillugit tamakku pillugit inatsit naapertorlugu akitsuutinik akiliutinillu akiliisussaatinneqannginnissani qinnutigisinnaavaa. Takuuk sermimut imermullu inatsimmi § 25, imm. 3 aamma 4.

1.7 Nakkutilliineq

Naalackersuisut pisinnaatitsissut naapertorlugu ingerlatat nakkutigissavaat, ilanngullugit ilaatigut ingerlatat avatangiisinut aamma erngup pitsaassusissaanut tunngasut aammattaaq uumassusilinnut tappiorannartunut tunngasut.

Inuk nakkutilliinermik ingerlatsisoq qaqugukkulluunniit eqqartuussisup aalajangiinera piginagu pissusissamisoortumillu kinaassutsiminik uppersaanikkut suliffeqarfiup immikkoortuinut tamanut ingerlatsineranullu isersinnaatitaavoq, tamatuma nakkutilliinermut atatillugu pisariaqarnera naapertorlugu, aamma paasissutissanik pisariaqartunik suliffeqarfimmut ingerlatsinermullu tunngasunik tamanik pisinnaanermut.

Inuk nakkutilliisoq aamma Naalackersuisut, ilaatigut nakkutilliineq ingerlanneqarsimasoq tunngavigalugu, sermimut aamma imermut inatsimmik, atuinissamut pisinnaatitsissummik aamma atuinissamut pilersaarutip uninnissamullu pilersaarutip aamma inatsisit malittarisassallu allat, aalajangersakkat piumasaqaatillu allat pisinnaatitsissummik piginnittumut atuuttut unioqutinneqarsimanerat pillugit uparuaasinnaapput peqqussummillu nalunaaruteqarsinnaallutik.

1.8 Nalunaarusiortussaataaneq

Imermik sinneruttumik iluaquteqarnissamut pisinnaatitsissut naapertorlugu pisinnaatitsissummik pigisaqartup ukiut tamaasa ulloq 1. april ukiumi siuliani ingerlataqarsimanerit aamma inernerit pillugit nalunaarusiaq Inuussutissarsiornermut Nukissiuteqarnermullu Naalackersuisoqarfimmut nassiuttassavaa.

Naalackersuisut pisinnaatitsissummik pigisaqartup ingerlatat naammassineqarsimasut ingerlaavartumillu nalunaarutigisagassat pillugit ukiumoortumik nalunaarusiortarnermut piumasaqaatinik aalajangersaassapput. Naalackersuisut ilaatigut atugassarititaasunik aalajangersaasassapput akuersissummik pigisaqartup qularnaagassaanut

nioqqutissanik pisiortorfimmini aamma kiffartuussinernik ingerlatsisumini allatigullu sullissisumi paasisutissanik tunniussaqaqtarnissaat uppernarsaasiisarnissaallu pillugit, ingerlatat sermimut aamma imermut inatsimmi akuersissummut ilaasut pillugit.

Naalackersuisut aamma atugassarititaasunik aalajangersaasinnaapput pineqartunut tunngatillugu aalajangiisarnernut atatillugu.

Nalunaarusianik ilaalu ilanngullugit suliaqarnermi nassiussinermilu aningaasartuutaasut tamarmik pisinnaatitsissummik pigisaqaqtumit akilerneqassapput.

1.9 Sermimut imermullu inatsit aamma pisinnaatitsissut il. il. naapertorlugit pisinnaatitsissummik pigisaqaqtup pisussaaffii akisussaaffiilu aamma taarsiinissamut akisussaaffeqarneq

Pisinnaatitsissummik pigisaqartoq pisussaavoq eqqortissallugu naammassissallugillu aalajangersakkat, atugassarititaasut, aalajangiinerit aamma peqqussutit tamaasa sermimut aamma inatsit naapertorlugu, akuersissut iluaquteqarnissamik pilersaarut akuerisaasoq taamaatitsinissamullu pilersaarut, aammalu ingerlatseqatigiiffiup pilersuisuusup imermik pisisarnissamut isumaqatigiissutaa il.il.

Aammattaaq pisinnaatitsissummik pigisaqartoq pisinnaatitsissut naapertorlugu ingerlatsinermut atatillugu ajoqusiinernut aamma annaasanut taarsiissuteqarnissamut akisussaaffeqarpoq, aamma ajoqusiinernut annaasanullu piaarinaatsoornikkut pisimasunut.

Pisinnaatitsissummik pigisaqartoq tassaappat ingerlatseqatigiiffiit arlaqartut peqatigissut, ingerlatseqatigiiffiit taakkua Naalackersuisunut ataatsimoorlutik (pisussaassuteqatigiillutik) pisussaaffeqarlutillu akisussaaffeqarput.

1.10 Sumiiffimmi pisinnaatitsissuteqarfiusumi allat ingerlataat

Sumiiffik pisinnaatitsiffiusoq pilersuisutut ingerlatseqatigiiffiup, tamatumunnga ilaalluni assersuutigalugu Nukissiorfiit, imermik atugassaminik tigooraaffia ingerlatsinernillu tassunga attuumassuteqartunik suliaqarfia pisinnaatitsissummut ilaassaaq. Pilersuisutut ingerlatseqatigiiffiup sumiiffik tamanna aamma sumiiffimmi tassani atuiniarluni ingerlatsinerit akisussaaffigai.

Pisinnaatitsissummik pigisaqartoq sumiiffimmik pisinnaatitsissuteqarfiusumik pilersuisutut ingerlatseqatigiiffiup atuiniarluni ingerlataqarfiani tunineqarpat pisinnaatitsissummik pigisaqartup aamma pilersuisutut ingerlatseqatigiiffiup sumiiffimmi pisinnaatitsissuteqarfiusumi pisinnaatitsissutit pioreersut ataqqissavaat.

Sumiiffiup pisinnaatitsissuteqarfiusup iluani pisinnaatitsissummik piginnittup aamma pilersuisutut ingerlatseqatigiiffiup saniatigut susassaqtut allat ilaatigut pisinnaatitsissummik tunineqarsinnaapput akuersissummillu tunineqarsinnaallutik makkuninnga ingerlatsinissanut:

1. Sermimik aamma imermik iluaquteqarnissamut pisinnaatitsissutit naapertorlugit sumiiffinni najugaqtut atugassaannik pilersuineq siunertaralugu ingerlatsinissanik nalunaarfigineqarsinnaallutillu ingerlatsininnaapput.
2. Sermimik aamma imermik iluaquteqarnissamut pisinnaatitsissutit aamma akuersissutit naapertorlugit nammeneq atugassanut ingerlatsinissanik nalunaarfigineqarsinnaallutillu ingerlatsininnaapput.
3. Sermimut aamma imermut inatsit naapertorlugu aningaasarsiutigalugu sermimik aamma imermik iluaquteqarnissamut pisinnaatitsissutit naapertorlugit ingerlatsinissanik nalunaarfigineqarsinnaallutillu ingerlatsininnaapput, tamanna pisinnaatitsissummik pigisaqartup pisinnaatitsissutaa naapertorlugu pisinnaatitsissummik pigisaqartup pisinnaatitaaffiunut unioqqutitsinerunngippat.
4. Ingerlatsisoqarnissaanut akuersissut tunniunneqarsimappat misissueqqaarnissamut, ujarlernissamut aamma aatsitassanik iluaquteqarnissamut inatsimmik tunngaveqartumik, ingerlatsinerillu taamaattut akuersissutillu tamakkununnga ajornartingippassuk, killilersunngippassuk imaluunniit allatigut sermimut imermullu inatsimmik tunngaveqartumik iluaquteqarnissaq sunniuteqarfiginngippassuk.
5. Sermimut aamma imermut inatsit imaluunniit aatsitassarsiornermut inatsit naapertorlugu roojorinik, pilersitanik, attaveqaasersuinernik il.il. pilersitsinissanut ingerlatsinissanullu pisinnaatitsissutit imaluunniit akuersissutit naapertorlugit ingerlatsinissanik nalunaarfigineqarsinnaallutillu ingerlatsininnaapput,.
6. Takornariatitsisarnermut akuersissuteqarani takornariatitsinermik ingerlatsineq aamma takornariatitsisarnermut akuersissuteqarluni takornariatitsinermik ingerlatsinissanik nalunaarfigineqarsinnaallutillu ingerlatsininnaapput inatsit tassunga atuuttoq naapertorlugu Naalakkersuisunit nalunaarfigineqarnikkut.
7. Namminersorlutik Oqartussat erngup pissusaanut tunngasunik aamma sermip/aputip pissusaanut tunngasunik nalinginnaasunik aamma

paasisutissanik katersinissamat tunngasunik misissuinernik nalunaarsuinernillu ingerlatsisinnaapput.

Ingerlatsinissanut allanut, ilaatigut qulaani taakkartorneqartunut, pisinnaatitsissummik imaluunniit akuersissummik nalunaaruteqarnikkut ingerlatsinerit ima ingerlanneqarnissaat pillugu Naalackersuisut piumasaqaatinik aalajangersaassapput pisinnaatitsissut naapertorlugu pisinnaatitsissummik pigisaqartup aamma pilersuisutut ingerlatseqatigiiffiup ingerlatsineri pisariaqanngitsumik akornusersorneqassanngitsut.

Sumiiffiup pisinnaatitsissuteqarfiusup, pilersuisutut ingerlatseqatigiiffiup atuniarluni ingerlataqarfiani, saniatigut sumiiffik pisinnaatitsissuteqarfiusoq sulii alla pisinnaatitsissummut aamma ilaasinnaavoq, tassani erngup sinneruttup atornissaa pillugu pisinnaatitsissummik pigisaqartoq nammineq ingerlatsinerminik ingerlataqassalluni. Assersuutigalugu tassaasinnaavoq toqqortaqaarneq, suliarinnineq imaluunniit imermik sinneruttumik atorneqartumik puiaasanut maqitsineq. Taama ittuni pisinnaatitsissummik pigisaqartoq nammineq sumiiffimmut tassunga tassanilu ingerlataminut akisussaassaaq.

1.11 Pisinnaatitsissutip allamut tunniunnera

Toqqaannartumik, toqqaannanngitsumik imaluunniit piumasaqaatitalimmik pisinnaatitsissummik allamut tunniussineq sunaluunniit Naalackersuisunit siumut akuerineqaqqaartinnani pisinnaanngilaq. Naalackersuisut tunniussineq akuerisinnaavaat pisinnaatitsissummik pigisaqartup nutaap ilaatigut pisinnaatitsissummik pigisaqartumut piumasaqaatit aamma sermimut imermullu inatsit pisinnaatitsissullu naapertorlugit piumasaqaatit allat naammassippagit.

Toqqaannartumik tunniussineq tassaavoq akuersissummik pigisaqartumiit akuersissutip illuatungiusumut allamut tunniunneqarnera. Toqqaannanngitsumik tunniussineq tassaavoq piginneqataassutinik akuersissummik pigisaqartumi ingerlatseqatigiiffimmi tunniussineq, ingerlatseqatigiiffimmi akuersissummik pigisaqartumi sunniuteqalernissamik kinguneqartussaag imaluunniit aalajangiisunngornissamik kinguneqartussaag.

Naalackersuisut akuersinerisigut ilaatigut qularnaarneqartussaassaaq akuersissummik pigisaqartup pisussaaffiisa naammassineqartussaanagerat peerneqassanngitsog tunniussinikkulluunniit ajorseriartinneqassanngitsog.

1.12 Pisinnaatitsissummik aamma atuinissamut pilersaarutip uninnissamullu pilersaarutip akuersissutaannik utertitsineq

Naalackersuisut akuersissummi atugassarititaasunik aalajangersaassapput akuersissutip utertinneqartarnera pillugu, aammalu iluaquteqarnissamut pilersaarutip unititsinissamullu pilersaarutip akuersissutigineqartarneri pillugit.

Naalackersuisut ataatsimut isigaluni taamaallaat akuersissut aamma iluaquteqarnissamut pilersaarutip unititsinissamullu pilersaarut utertissinnaassavaat akuersissummik pigisaqartup ingerlatseqatigiiffillu imermik pilersuisuusoq imermik pisisarnissamut isumaqatigiissutaasoq sanioqqullugu iliuuseqarsimappat, imaluunniit akuersissummi atugassarititaasut iluaquteqarnissamulluunniit pilersaarutaasoq imaluunniit sermimut aamma imermut inatsit tassaniluunniit aalajangersakkat sanioqqunneqarsimappata, imaluunniit akuersissummik pigisaqartup piffissaliussatut aalajangersakkat qaangersimappagit.

Akuersissut aamma iluaquteqarnissamut pilersaarummik akuersissuteqarneq taamaatitsinissamullu pilersaarummik akuersissuteqarneq aammattaaq ilaatigut utertinneqarsinnaapput akuersissuteqarnermut atugassarititaasut imaluunniit akuersissuteqaannarnissamut tunngaviusut naammassineqarunnaarsimappata, imaluunniit akuersissummik pigisaqartoq sulianik unititsippat imaluunniit akiliisinnaajunnaartutut nalunaarutigineqarpat il.il.

1.13 Pissutsit pinngortitamut aamma avatangiisinut tunngasut aamma kulturikkut eqqaassutissat aamma kulturikkut nunap isikkui

Atuinissamut pisinnaatitsissut naapertorlugu pinngortitamut avatangiisinullu tunngasut ataatsimut isigalugit Pinngortitamik illersuineq pillugu Inatsisartut inatsisaanni nr. 29, 18. december 2003-meersumi (pinngortitamik illersuinermit inatsit) aamma Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersumi (avatangiisit innarlitsaaliornissaannut inatsit) inatsisit kingusinnerusukkut allanngortinneqarneri ilanngullugit tunngavigalugit aqunneqarput, aamma inatsisit taakku naapertorlugit aalajangersakkat aalajangersarneqarsimasut tunngavigalugit malittarisassaqartinneqarput.

Taamaattorli avatangiisit innarlitsaaliornissaannut inatsit naapertorlugu sanaartugassat annertuut imaluunniit allatigut suliffeqarfimmik pilersitsiniarneq annertuumik avatangiisinut sunniuteqartussatut isumaqarfigineqartoq aatsaat VVM-imut

nalunaarusiap suliarineqareerneragut Naalakkersuisunullu tunniunneqareerneragut aallartinneqarsinnaavoq.

Pisinnaatitsissutit ataasiakkaat tunngavigalugit ilaatigut nalilerneqassaaq pisinnaatitsissut naapertorlugu ingerlatsinissat sanaartugassallu ima kinguneqartitsissanersut VVM-imut nalunaarusiaq pisinnaatitsissummik pigisaqartumit suliarineqassanersoq, Naalakkersuisunillu akuerineqarluni avatangiisit innarlitsaaliornissaannut inatsit naapertorlugu. Aammattaaq ilaatigut nalilersorneqassaaq pinngortitamut kingunerisassat misissoqqissaarnerat pisinnaatitsissummik pigisaqartumit suliarineqassanersoq pinngortitamillu illersuineranut inatsimmi tamatumunnga aalajangersakkat naapertorlugit Naalakkersuisunit akuerineqassanersoq.

Sumiiffinni atuinissamut pisinnaatitsissut naapertorlugu ingerlataqarfiusuni eqqissisimatitsineq aamma allatigut kulturikkut eriagisassanik kulturikkut kingornussatut illersuineq nalinginnaasumik Eqqissisimatitsisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut Inatsisaat nr. 11, 19. maj 2010-meersoq kingusinnerusukkullu allangortinneqartoq nalunaarusiallu naapertorlugit ingerlanneqartarput.